

新元史

第五十册

列傳第九十五

新元史卷之一百九十八

賜進士出身日講起居注官翰林院侍讀國史館纂修膠州柯劭忞撰

哈刺哈孫

不忽木

回回

巉巉

哈刺哈孫幹刺納兒氏太祖功臣乞失里黑之曾孫也
祖博理察父囊家台並見乞失里黑傳哈刺哈孫威重
不妄言笑善騎射尤雅重儒術至元九年世祖錄勲臣
後命掌宿衛襲號荅刺罕自是人稱荅刺罕而不名嘗
從獵馬踢傷面入直如平常帝命醫療之眷益重帝嘗
諭之曰汝家勲載天府行且大用汝矣又語皇太子曰
荅刺罕非常人比可善遇之十八年以欽廉二州益其

食邑二十二年拜大宗正用法平允嘗遣使決各路獄囚哈刺哈孫按獄詞不具者悉令覆勘僅奏決六十人大同民毆鷹房三人死左右以聞帝怒亟遣哈刺哈孫治之止坐其爲首者京師造僞鈔者連富民百餘家哈刺哈孫盡釋之時相請以江南獄隸宗正府哈刺哈孫言其不便事遂止二十八年以丞相安童薦拜榮祿大夫湖廣行省平章政事臺臣言哈刺哈孫在宗正決獄平卽去恐難其繼者帝曰湖廣非斯人不可命勿留遂行初樞密置行院於各省分兵民爲二哈刺哈孫入覲極陳其不便帝爲罷之因問曰風憲之職人多言其撓

吏治信乎對曰朝廷設此以糾奸慝貪吏疾之妄爲此
言帝然之三十年平章劉國傑征交趾哈刺哈孫戒將
吏無擾民有奪民魚菜者杖其千戶軍中肅然俄勅發
湖廣富民萬家屯田廣西以圖交趾哈刺哈孫密遣使
奏曰往年遠征失利瘡痍未復今又徙民瘴地必將怨
叛使還報罷民皆感悅及廣西元帥府請募南丹五千
戶屯田事上行省哈刺哈孫曰此土著之民誠爲便之
內足以實空地外足以制交趾之寇不煩士卒而饋餉
有餘卽命度地立爲五屯統以屯長給牛種農具與之
湖南宣慰使張國紀建言欲按唐宋末徵民間夏稅哈

刺哈孫曰亡國弊政失寬大之意聖朝豈可行耶奏止之大德二年入朝上都拜江浙行省左丞相視事七日徵拜中書左丞相進階銀青光祿大夫既拜命斥言利之徒一以節用愛民爲務有大政事必引儒臣共議京師無孔子廟國學寓他署乃奏建廟學選名儒爲學官使近臣子弟入學又集羣議建南郊爲一代定制五年雲南行省左丞劉深建議征八百媳婦右丞相完澤以帝未有武功請從之哈刺哈孫曰山嶠小夷可喻之使來不足以煩中國不聽竟發兵二萬命深將以往及次順元深使雍真葛蠻土官宋隆濟備餽運夫馬刻期嚴

急民不堪命遂圍深於窮谷首尾不能相援事聞遣劉國傑往援擒斬隆濟等然士卒存者十僅一二帝始悔不用其言會赦有司議釋深罪哈剌哈孫曰微功首釁喪師辱國非常罪比不誅無以謝天下奏誅之七年進中書右丞相嘗言治道必先守令乃精加遴選定官吏贓罪十二章及丁憂婚聘盜賊等制禁獻戶口及山澤之利著爲令車駕幸上都哈剌哈孫必留守京師帝不豫政出中宮羣邪黨附之哈剌哈孫匡救其間天下晏然十年加開府儀同三司監修國史冬十一月帝疾甚入侍醫藥出總宿衛諸王請入侍疾不聽十一年春正

月成宗崩時武宗撫軍北邊仁宗侍太后在懷慶左丞相阿忽台議請皇后垂簾聽政立安西王阿難荅哈刺哈孫密遣使北迎武宗收京城百司符印封府庫稱疾臥省中內旨日數至並不聽文書皆不署衆欲害之未敢發及仁宗至近郊衆猶未知三月朔列牘請署皇后以三月三日御殿聽政哈刺哈孫立署之衆大喜莫知所爲明日迎仁宗入執阿忽台及安西王阿難荅等誅之內難悉平自冬至春未嘗至家休沐夏五月武宗至卽皇帝位拜太傅錄軍國重事仍總百揆賜宅一區以其子脫歡入侍初仁宗之入也阿忽台有勇力人莫敢

近諸王禿刺手縛之以功封越王三宮盡幸其第賜與甚厚以慶元路爲其食邑哈刺哈孫力爭曰祖制非親王不得加一字封禿刺踈屬豈得以一日之功廢萬世之制帝不聽禿刺因譖於帝曰方安西王謀干大統哈刺哈孫亦署其文書由是罷相出鎮北邊詔曰和林爲北邊重鎮今諸部降者又百餘萬非重臣不足以鎮之念無以易哈刺哈孫者賜黃金三百兩白銀三千五百兩鈔十五萬貫帛四萬端乳馬六十匹以太傅右丞相行和林省事太后亦賜帛二百端鈔五萬貫至鎮斬爲盜者一人分遣使者賑降戶奏出鈔帛易牛羊以給之

近水者教取魚食之會大雪命諸部置傳車相去各三百里凡十傳轉米數百石以餉饑民不足則益以牛羊又度地置內倉積粟以待來者浚古渠溉田數千頃復稱海屯田歲得米二十萬石北邊大治至大元年賜斡爾朶如諸王制十一月寢疾語其屬曰吾不能治行省事矣汝曹勉之卒年五十二帝聞之驚悼曰喪我賢相賻鈔二萬五千貫詔歸葬昌平追贈推誠履政佐運功臣太師開府儀同三司上柱國追封順德王諡忠獻子脫歡由太子賓客拜御史中丞襲號荅剌罕進御史大夫行臺江南尋拜平章政事行省江浙進左丞相兼領

行宣政院重厚有父風喜讀書爲政不尙苛暴得衆心致和元年卒年三十七子蠻蠻

不忽木康里氏世爲其部大人祖海藍伯事克烈王汗王汗滅率所部遁去太祖使招之不從後莫知所終父燕真海藍伯第十子方六歲爲太祖所獲分賜莊聖皇后性恭謹善爲弓衣侍世祖於潛邸配以高麗女金氏名長姬及長從征伐有功憲宗將伐宋命世祖居守燕真諫曰上素疑殿下今上親征殿下不從可乎世祖請從憲宗悅使世祖分兵趨鄂州憲宗崩燕真統世祖留部知阿里不哥有異志奉皇后至上都世祖卽位未及

擢用而卒後贈太傅河南行省左丞相追封晉國公諡忠獻不忽木幼事裕宗年十二進止詳雅已如成人師事贊善王恂恂扈駕北征詔不忽木入國學受業於祭酒許衡衡以爲有公輔之器名之曰時川字用臣世祖命諸生獻其所習字不忽木年十六書貞觀政要數十事以進世祖嘉歎久之至元十三年與同舍生疏請宏展國學擇蒙古人年十五以下十歲以上質美者百人百官子弟與凡民俊秀者百人定其餽廩之制選司業博士助教教之其諸生學業成就者聽學官保舉依例入仕未成就者令照舊學習其終不可教者聽出學凡

學政因革損益皆得不時奏聞疏上世祖嘉納之十四
年授利用少監十五年出爲燕南河北道按察副使世
祖遣通事脫脫護送西僧過眞定僧筆驛吏幾死按察
使不敢問不忽木受驛吏狀下僧於獄脫脫欲出之詞
氣倔強不忽木責以不職使免冠跪庭下脫脫逃歸以
聞世祖曰不忽木素剛正必汝輩犯法故也已而不忽
木奏至世祖曰朕固知之十九年擢按察使靜州守吏
盜官錢詔不忽木按之歸報稱旨賜銀鈔有差二十一
年召參議中書省事時盧世榮黨附桑哥揚言能用已
則國賦可十倍於舊世祖問於不忽木對曰聚斂之臣

操術以罔其君及罪惡稔國與民俱困雖悔無及世祖
不聽以世榮爲中書右丞不忽木辭參議不拜二十二
年世榮伏誅世祖謂不忽木曰我殊愧卿擢吏部尙書
時方籍阿合馬家其奴張織札爾等當死謬言阿合馬
家貲寄頓者多盡得之可充國用於是鉤考隱匿逮及
無辜不忽木曰此奴爲阿合馬爪牙死有餘罪爲此言
欲徼幸不死耳豈可復受其誑嫁禍良善耶丞相安童
以其言入奏世祖悟命不忽木鞫之具得情實織札爾
等伏誅二十三年改工部尙書遷刑部尙書河東按察
使阿合馬貲官錢抑取部民貲產償之遣使者數輩按

問皆不伏不忽木往發其奸贓百餘事會大同饑不忽木便宜出廩粟賑之阿合馬所善幸臣劾不忽木擅發軍儲又鍛鍊阿合馬之獄使誣服世祖曰發粟賑饑何罪之有命逮阿合馬至京師鞠之竟伏誅土土哈求欽察人爲奴者充其軍籍濫及良民中書遣僉省王遇覈其籍汰之土土哈奏遇有不遜語世祖怒欲殺之不忽木力諫遇得免死二十四年桑哥奏立尙書省誣殺參政楊居寬郭佑不忽木爭之不能得桑哥深忌之嘗指不忽木謂其妻曰他日籍我家者必此人也使西域賈人詐爲訟冤者賂不忽木珠一篋不受旣而知其事出

於桑哥遂以病免二十七年拜翰林學士承旨知制誥兼修國史二十八年春世祖獵於柳林不忽木之弟野禮審班及徹里等劾奏桑哥罪狀世祖召問不忽木具以實對世祖始決意誅之罷尙書省復以六部隸於中書世祖欲相不忽木固辭世祖問孰任爲相不忽木薦太子詹事完澤是時上春秋高成宗撫軍北邊位號未正不忽木謂相東宮舊臣可以杜姦人之覬覦世祖默然良久曰卿慮及此社稷之福也乃拜完澤右丞相不忽木平章政事不忽木議革桑哥弊政召用舊臣爲桑哥所貶斥者尤重文學知名之士使更相引薦布列臺

省桑哥之黨惟忻都納速丁蔑理王濟等罪狀尤著誅之其餘隨材擢用待之無間於是人情翕服上都留守蔑巴爾思言改按察置廉訪司不便撫憲臣賊罪以動上聽世祖責中丞崔彧彧謝病不知不忽木面斥之極論廉訪司不宜罷世祖意始釋王師征交趾失利復謀大舉不忽木諫曰獸窮則噬勢使之然今陳日燇襲位若遣使諭以禍福彼必聽命如不悛加兵未晚世祖從之已而日燇感懼遣使詣闕請罪獻前六歲之貢物世祖曰卿一人之力也以其半賜之不忽木固辭惟受沉香假山象牙鎮紙水晶數事平章政事麥朮丁請復立

尙書省專領戶工刑三部不忽木詰之曰阿合馬桑哥身戮家敗前鑒不遠汝奈何又效之事獲寢又有言京師蒙古人宜與漢人間遠以示制防不忽木曰此姦人欲擅貿易之利借爲忠言以熒上聽耳乃圖蒙古人第宅與民居相錯之狀奏之事亦寢達刺海求征理錢穀逋懸省臣請入止之不忽木曰無庸宜聽其所爲彼不久自敗也已而果以賄誅有請加江南包銀者不忽木曰江南履畝納稅輸酒醋課及門徭水馬驛遞又增包銀則重斂矣民將不堪其議始罷三十年有星孛於帝座世祖憂之夜召不忽木問以塞天變之道對曰陛下